

Igl amprem quartal 2022 ò la suprastanza communal tracto tranter oter igls affars suandonts:

Fatgs generals, fatgs da personal, economia e provedimaint d'energeia

- Saramentaziun dalla nova commembra da suprastanza communal, Irene Kolb, per la perioda d'uffezi 2022 anfignen 2025;
- Fixaziun digls prietschs pigl onn 2022 pert. lavours digl sarvetsch forestal e tecnic per terzas persungas;
- Fixaziun dallas tariffas da canzleia pigl onn 2022;
- Tscharnia Giorgio Signorell da Sur scu nov commember per la cumischung da biagier digl cumegn da Surses sen igl 01-02-2022. El surpeglia igl uffezi da Diego Casparin, tgi ò do ancunaschaint la sia demissiun pigls 31-01-2022;
- Decisiun da surdar en mandat temporar per dus collaboratouras alla Curia Treuhand SA a parteir digl favrer 2022 pigl sustign personal digls sarvetschs d'abitant(a)s. Chegl anfignen tgi las dus plazzas vacantas èn puspe occupadas;
- Deliberaziun digl messadi per mangs digls votants e dallas votantas pert. la votaziun all'urna digl cumegn da Surses digls 13 da mars 2022;
- Decisiun d'organisar en'oura da consultaziun per la populaziun da Riom-Parsonz glindesde, igls 4 d'avregl 2022, allas 20.00, an sala polivalenta a Riom;
- Decisiun d'organisar l'oura da consultaziun per la populaziun da Salouf glindesde, igls 30 da matg 2022, allas 20.00, an sala polivalenta a Salouf;
- Do consentimaint alla candidatura da Patrizia Zanini pigl presidi dall'Uniun Parc Ela. Pinavant proponer la candidatura da Samuel Loretz, vice-president da Bivio Sportanlagen SA, pigl post ainten suprastanza dall'uniun.
- Tscharnia Luzi Giovanoli scu commember ed actuar dalla cumischung sociala digl cumegn da Surses;
- Elecziun da Simon Bergamin per la nova piazza scu manader construcziun/energeia/ovras pigl 1. d'avregl 2022.
- Approvaziun digl nov organigram communal, valevel a parteir digl 1. d'avregl 2022 cun la nova structura e novas responsablads, scu er igls novs scalems e las novas denominaziuns da funcziun;
- Decisiun da publitgier aint igl figl uffizial la tschertga da persungas interessadas per lavours da translaziuns digl cumegn, cun indemnizaziun ad ouras.
- Decisiun d'augmentar igl pensum dalla piazza da secretariat pigl manader da sectour digls sarvetschs technics d'anfignen ossa 20% ad en pensum da 40%.
- Tscharnia Urs Amstutz da Riom scu nov commember dalla cumischung da biagier digl cumegn da Surses sen igl 01-04-2022. El surpeglia igl post da Simon Bergamin, tgi è nia eligia scu nov manader dalla partiziun construcziun/energeia/ovras;
- Decisiun da publitgier ena piazza da 50% anfignen 70% per la successiun da Luzi Giovanoli, referendari finanzas, tgi vo igls 31 d'avost 2022 an pensiu;

Turissem

- Decisiun da prolungar las cunvignientschas da prestaziun existentas e da manar anavant igl menaschi da bus durant la stad 2022.

Siertad publica e traffic

- Decisiun d'inoltrar igl concept da repartiziun da tabletas da jod (jodid da calium) communal, per mangs digl Uffezi da militer e da protecziun civila grischun pigl lascher examinar;
- Decisiun da dar las lubientschas a basa dallas leschas valevlas la premaveira 2022 ed anfignen tgi la procedura è terminada e la lescha per carar sen veias da prada, fons, gôt e veias d'alp vo an vigour.



Fatgs da biagier, planificaziun digl territori e planisaziun locala

- Decisiun da surdar las lavours da planisar e manar la construcziun conc. la sanaziun totala dalla punt da lenn Mulegn a Parsonz agl biro d'inschigner Walter Bieler, Panadoz;
- Decisiun d'incaricar igl biro Basler & Hofmann da far en'expertisa da traffic e canera pert. la santientzga dalla Dertgira administrativa digl cantun Grischun digls 16 da december 2021 an connex cun igl recurs tgi è nia inoltro cunter la dumonda da biagier dalla RESalpina GmbH per en resort da vacanzas a Viols, Savognin;
- Approvaziun digl nov contract da dretg da compra (prolungaziun) cun la Panorama Development SA pert. la parcella nr. 3281 a Viols, Savognin;
- Decisiun da surdar las lavours da mester impressari pert. la sanaziun dalla veia da gôt Igl Fanc (project SIE 2022) alla firma Luzio Tiefbau SA, Savognin. Las lavours da reparatura dalla stresa d'isada scu er la renovaziun dallas chinettas vignan surdadas alla firma Cotti Agrar Forst Kommunal, Sur;
- Decisiun da far las lavours da renovaziun ainten l'antieriura tgesa da scola da Tinizong per piazzas da biro supplementaras per l'administraziun communal e da surdar las incumbensas allas interpresas;
- Decisiun da surdar las lavours conc. la sanaziun dalla veia cantunala ainten la vischnanca da Parsonz. Las lavours da mester impressari vignan surdadas a Rizzi SA, Tgazzas e las lavours sanitaras a Caspar SA, Tinizong.

Ovras communalas, infrastruttura turistica, economia forestala

- Approvaziun d'ena lubientscha da menaschi provisorica a Tania e Philippe Poltera per la piazza da campar naturala Geissenhof a Rona cun la permissiun d'utilisar ena part dalla parcella da cumegn nr. 2091;
- Consentimaint alla proposta da procedura conc. la nova lescha d'alp, pastgiras e prada digl cumegn Surses cun en'occorrenza d'infurmaziun per la puraglia;
- Decisiun conc. igl risguard digls lis an Surses aint igl nov plan directiv regional dallas piazzas da campar;

Tinizong, igls 19 d'avregl 2022

Suprastanza communal da Surses